

**Blondel de Nesle**

## Chanson d'amour

En tous tens que vante bise,  
Pour cele dont sui soupris,  
Qui n'est pas de moi surprise,  
Devient mes cuers noirs et bis.  
De fine amour l'ai requise,  
Qui cuer et cors m'a espris,  
Et, s'ele n'en est esprise,  
Pour mon grant mal la requis.

Mais la douleurs me devise  
Qu'a la meilleur me suis pris  
Qui ainc fust en cest mont prise,  
Se j'estoie a son devis.  
Tort a mon cuer qui s'en prise,  
Quar ne sui pas si eslis.  
S'ele eslit, qu'ele m'eslise!  
Trop seroie de haut pris.

Et nequedent destinee  
D'une a la gent maint pensé :  
Tost i metra sa pensee  
S'amours li a destiné.  
Je vi ja tel dame amee  
D'ome de bas parenté  
Qui mieuz ert emparentee,  
Et si l'avoit bien amé.

Pour c'est drois, s'Amours m'agree,  
Que mon cuer li ai donné.  
Se l'amour ne m'a donné,  
Tant la servirai a gré,  
S'il plaist a la desirree,  
Que un baisier a celé  
Avrai de li a celee,  
Que tant ai desirré.

**Blondel de Nesle**

## Chanson d'amour

Se savoient mon tourment  
Et auques de mon affaire  
Cil qui demandent comment  
Je puis tant de chançons faire,  
Il diroient vraiment  
Que nus a chanter n'entent  
Qui mieuz s'en deüst retraire ;  
Maiz pour ce chant seulement  
Que je muir pluz doucement.

Trop par me grieze forment  
Que cele est si debonaire  
Qui tant de dolour me rent  
Ce qu'a tout le mont doit plaie ;  
Maiz ne me grevast nient,  
Se la tres bele au cors gent  
Me feïst touz ces maus traire.  
Maiz ce m'ocit vraiment  
Qu'el ne set que pour li sent.

Se seüst certainement  
Mon martire et mon contraire  
Cele por qui je consent  
Que l'amour me tient et maire,  
Je croi bien qu'alegement  
M'envoïast procheinement ;  
Quar par droit le deüst faire,  
Se reguars a escient  
De ses biaux ieus ne me ment.

Chançons, va isnelement  
A la bel au cler viaire,  
Si li di tant seulement :  
Qui de bons est, souëf flaire.  
Ne l'os prier autrement,  
Quar trop pensai hautement,  
Si n'en puis mon cuer retraire.  
Et se pitiez ne l'en prent,  
Blondiaus muert, que pluz n'atent.

## Blondel de Nesle

### Chanson d'amour

Cuer desirrous apaie  
Douçours et confors,  
Etjou d'amours veraie  
Sui en baisant mors.  
S'encor ne m'est autres dounez,  
Mar fui onques de li privez  
A morir sui livrez  
Se trop le me delaie.

Privez baisiers est plaie  
D'amours dedenz cors ;  
Mout m'angoisse et esmaie,  
Si ne pert dehors.  
Ha, las! pour quoi m'en sui vantez,  
Quant ne m'en puet venir santez  
Se ce dont sui navrez  
Ma bouche ne rassaie ?

Amours, vous me feïstes  
Mon fin cuer trichier,  
Qui tel savour meïstes  
En son douz baisier.  
A morir li avez apris  
Se pluz n'i prent qu'il i a pris,  
Dont m'est il bien avis  
Qu'en baisant me trahistes.

Certes, mout m'atraisistes  
Juene a cel mestier,  
N'ainc nului n'i vousistes  
Fors moi engignier.  
Je suis hi plus loiauz amis  
Cui onques fust nus biens pramis.  
Hé las! tant ai je pis!  
Amours, mar me nourristes.

Se je Dieu tant amaisse  
Com je fais celi  
Qui si me painne et lasse,  
J'eüsse merci ;  
Qu'ainc amis de meilleur voloir  
Ne la servi pour joie avoir  
Com je fais tout pour voir  
Sanz mente et sanz grasse.

Se de faus cuer proiaisse  
Dont je ne la pri,  
Espoir je recouvraisse,  
Maiz n'est mie ainsi ;  
Neja Dieus ne me doint voloir  
De hi deçoivre sanz doloir.  
Ce me tient en espoir :  
Qu'Amours blece et respasse.